



**Komunikadu Imprensa**  
**10 Setembru 2021**  
**Parlamentu Nasionál**

**JSMP apresia ho Komisaun F ne'ebé inklui mós direitu fundamental labarik sira nian iha relatóriu apresiasaun inisiál projetu Lei Protesaun Labarik no Foin Sa'e iha Perigu**

Komisaun F Parlamentu Nasionál (PN) iha 07 Setembru 2021, konsege apresenta nia relatóriu apresiasaun inisiál ba Projetu Lei Nú.29/V(3<sup>a</sup>) Lei Protesaun ba Labarik no Foin Sa'e iha Perigu iha reuniaun plenária extra-ordinária.

Iha relatóriu paraser ne'e, Komisaun F inklui mós direitu fundamental labarik sira nian iha estrutura foun lei ne'e. Alende ne'e, inklui mós definisaun sira kona-ba idade no mós nesesidade atu estabelese fatin ne'ebé ketak ba vítima no suspeitu hodi evita kontaktu direita entre vítima ho suspeitu sira iha prosesu judisiál no mós serbisu prevensaun nian ba labarik sira. Ho nune'e bele hariku liután materia ba deputadu sira komisaun F iha diskusaun sira iha especialidade nian.

“JSMP apresia Parlamentu Nasionál, partikularmente serbisu Komisaun F ne'ebé inklui mós direitu fundamental labarik sira nian iha relatóriu apresiasaun inisiál ba esbosu projetu Lei Protesaun Labarik no Foin Sa'e. JSMP konsidera lei ne'e nu'udar elementu xave atu oinsa bele asegura ezersísiu ba labarik no foin sa'e sira nia direitu liberdade fundamentál sira inklui direitu ba protesausun ba labarik sira iha risku ba violasaun sira-nia direitu”, dehan diretora JSMP, Ana Paula Marçal.

Iha JSMP nia paraser\* ne'ebé apresenta ona ba Komisaun F kona-ba Esbosu Lei Protesaun ba labarik no Foin sa'e iha Perigu ne'e, JSMP mós husu atu lei ida ne'e

---

\* JSMP nia paraser kompletu bele asesu iha [https://jsmp.tl/wp-content/uploads/Paraser-Lei-Protesaun-ba-Labarik-husi-JSMP-Jullu-2021\\_TETUM.pdf](https://jsmp.tl/wp-content/uploads/Paraser-Lei-Protesaun-ba-Labarik-husi-JSMP-Jullu-2021_TETUM.pdf)



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

tenke refleta idea ka espíritu ne'ebé konstitui ka konsagra ona iha provizaun Artigu 18 K-RDTL no Konvensaun Internasional Direitu Labarik (KIDL) nian. Iha provizaun artigu ida ne'e konsagra idea prinsipál rua mak:

- a. Oinsa labarik sira bele goza direitu fundamentál sira hotu ne'ebé pertense ba ema moris ka pesoa umana ne'ebé rekoñese universalmente. Direitu sira ne'e mak konsagra ona iha K-RDTL no Konvensaun Internasionál sira direitu umanu nian ne'ebé Estadu RDTL ratifika, partikularmente KIDL nian.
- b. Oinsa labarik sira bele hetan protesaun, tantu protesaun espesiál nune'e protesaun sosiál.

Idea iha pontu ka letra a) nian ne'e mak K-RDTL no KIDL obriga Estadu kria medida lejizlativa, administrava ka medida relevante seluk hodi promove direitu no liberdade fundamentál sira labarik sira-nian liuhusi kria kondisaun, oportunidade no facilidade sira ne'ebé bele tulun labarik sira-nia iha termu dezenvolvimentu iha parte hothotu tantu fiziku, mentál, morál, espirituál no sosiál ho liberdade no dignidade tomak.

Kondisaun, oportunidade no facilidade sira ne'e, labarik sira hotu sei goza la ho diskriminasaun ba nia moris mai ho matrimonia ka lae, situasaun família, jéneru, tinan, rasa, etnia, kór, kondisaun física, fiar, matenek ka beik, kondisaun ekonómika, hela fatin no ambiente sosiál.

Pontu ka letra b) nian ne'e mak K-RDTL no KIDL obrigadu parte hothotu hahú husi família, comunidade to'o Estadu atu kontribui tuir idaidak nia área no kapasidade hodi proteje labarik sira hasoru violasaun ba sira-nia direitu fundamentál sira liuhusi mekanizmu sira ne'ebé própriu no adekua, partikularmente hasoru abandonu, diskriminasaun, violénsia, opresaun, abuzu seksuál no esplorasau. Relasiona ho mekanizmu protesaun ne'e, KIDL mós prevee ona mekanizmu balun ne'ebé Estadu Parte sira bele adota tuir idaidak nia realidade familiár, sosiál no nasaun nian.

Nune'e, JSMP hanoin, medida lejizlativa ida ne'ebé Parlamentu Nasionál inisia ne'e labele menus no mós labele ses liu husi idea ka espíritu ne'ebé konsagra ona iha K-RDTL ho KIDL. Nune'e, bainhira lei ne'e tama iha vigór no implementasaun, bele efetivamente fó solusaun ka rezolve ona kestaun sira relasiona ho asuntu sira labarik nian, la nesesariamente kria tan medida lejizlativa seluk kestaun ka asuntu hanesan. Alende ne'e, Parlamentu Nasionál rasik mós sei la lakon tempu no rekursu atu kria fali medida lejizlativa selseluk tan ba asuntu ne'ebé hanesan de'it.

Rua Beco Lakateu, Aldeia Manufuik,  
SukuColmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

Esbosu lei ne'e mós sai nu'udar advokasia JSMP nian durante tempu naruk ho nia deskobrimentu sira iha serbisu monitorizasaun ba tribunál sira ne'ebé JSMP apresenta iha nia relatóriu anual sira ba setór judisiáriu, Governu no Parlamentu Nasionál hodi bele garantia liutan direitu labarik no foin sa'e sira.

Entidade sira ne'ebé partisipa iha diskusaun ba esbosu lei ne'e mak hanesan Husi parte Sociedade Sivil kompostu husi ALFeLa, Asosiasaun Deficiente Timor-Leste (ADTL), NGO ba Futuru, Child Fund, Komisaun Nasionál da Direitu Labarik, Komisaun Nasionál Kontra Tralallu Infantil, Fokupers, FONGTIL, Fundasaun Alola, JSMP, Organizasaun Internasionál Traballu, Plan Internasionál, Parlamentu Foinsae no UNICEF.

Entretantu husi instituisaun públiku estadu nian mak Ministériu Justisa, Ministériu Saudí Ministériu Solidaridade Sosial no Inkluzsaun, Ministériu Edukasaun, Joventude no Desportu, Ministériu Interior, Ministériu Públiku, Defensoria Públiku, Provedór Direitu Umanu no Justisa no Komisaun Direitu Labarik Inklui mós autóridade lokál no lider relijiozu sira husi munisípiu Baukau no Bobonaro.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>  
[www.jsmp.tl](http://www.jsmp.tl)

Rua Beco Lakateu, Aldeia Manufuik,  
SukuColmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)

[ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl